

Na veièda su... L Comun General de Fascia

Che peissela la jent de Fascia de la desvaliva costions che revèrda noscia comunanza? Peon via l'enrescida da chesta neva istituzion, che l'é stat la maor neva de l'an giusta feni

Fascia - L'an 2010 se à serà sù, e con el l'é stat metù te scrign duc i fac, bie e burc, che l'à portà. Anter la neves maores de l'an giusta feni l'é stat de segur l'peor via del Comun General de Fascia.

Na istituzion neva, ma che à sia reijes fones te la storia de Fascia, che jà del 1200 l'aea te la "Comunità" l'gremium olache vegnia tout la dezijion per duta la comunanza.

Co éla peèda via chesta neva Istituzion? Prum de dut l'é da recordèr che per Fascia, e demò per noscia val te dut l Trentin, aldò de l'articol 19 de la Lege de reforma istituzionèla de la Provincia de Trent, l'é stat pervedù normes desferentes, che ge dèsc al Comun General na maor autonomia respet a l'atres "Comunità de Val" e ence iter desferenc. Aldò de chet te Fascia

la litazions per la neva istituzions les é states amò de mé, ensema con cheles de comun, enveze che chet uton desche tel rest del Trentin. E chet se à desmostrà segur na roba positiva.

La neva istituzion à tacà a lurèr e dant che sie fora l'an l'à metù jù e aproà la linies programaches, se pur aldò de n sistem amò "work in progress", descheche ge sà bel dir a la Procuradora Cristina

Donei, donca linies che podarà ence vegnir mudèdes tel temp aldò di besegnes. Chesta linies é states aproèdes da duc i Comuns, te 5 sun 7 di Comuns fascegn les à abù duta la stimes a favor, te un Comun (Moena) na stima de contra e te un Comun (Soraga) 3 astenscions e una stima de contra. N resultat per chel che - à dit l'president del Consei General Cesare Bernard - segur duta la Comunitàdes de

Val metessa la firma.

Te l'intervista del scomenz de l'an che l'giornalist Silvano Ploner ge à fat al President de la Provincia de Trent per Ercaboan, Lorenzo Dellai à dit che dò n prum moment de malsegureza ge sà de aer vedù te chet ultim temp n gran sbunf, per merit de la Procuradora e del Consei, e che l'é spervajo che mingol a l'outa la oportunitèdes les vegne toutes sù.

E la jent de Fascia che peissela de chesta neva istituzion?



Maria Elisabetta Lorenz.

Aon proà a jir stroz a domanèr curt l'parer di fascegn, vardan de tocèr jent desferenta per profecion e penser, e de ruèr mingol te duc i pajes. A duc ge aon domanèr:

Che pissèda del Comun General de Fascia?

Coluns él i obietives che l'cognosca se meter dant?

Co ve sèl che la sie pontèda via chesta neva istituzion?

Maria Elisabetta Lorenz, titolèra Bar de Penia:

"Gé a dir la biota verità, per chel che nos sion stac informé, l'é amò mingol na roba incerta, per cont mie. Dapò se vegn fora che veramentèr la competenzes les vegn tramudèdes al Comun General, per cont mie podessa ence esser na roba positiva. Ge vel veder coche i sarà spartii fora chisc poteres.

Per cont mie, enveze che jir a Trent per ogne roba, te podesses esser chiò, ajache ic (chi che l'é a cef del Comun General) sà che eijgenzes che l'é te ogne paisc, i cognosca la jent e i sà i besegnes che se à, e fossa più sori ressolven n muie de problemes che l'é, per la cèses, per la viabilità... per dut, percheche chi che vif te chesta zones i sà i problemes enveze a Trent i li cognosca pech.

Gé fin ades, a esser sinziera, é vedù ence critiches da pèrt de la jent, percheche no sion informé amò ben de chel che podessa esser. Dapodò vedaron col temp, percheche l'é na roba n muie neva e la jent no la pel subito se esprimer en positif o en negatíf, ge vel veder canche i taca a



Rinaldo Debortol.

caminèr a veder coche la é."

Rinaldo Debortol da Cianacei, maester e ispetor di studafech:

"L Comun General de Fascia l'é na oportunità, na oportunità per la desvaliva comunitàdes de la Val percheche se pel se gestir mingol più da soi, e l'é na autonomia en più.

I obietives del Comun General de Fascia l'é chi de gestir chi servijes che i va sora i confins de ogne comun, che podessa esser la sanità, la cultura, la segurezza e l'ambient. Chesta l'é la robes che cognosca esser medemes da Penia fin ja Moena.

Gé calcole che chisc prumes 5 egn sie n temp de tranzion, olache pian pian se cognarà passèr chesta competenzes. Zeche se aea jà fat dant col Comprenjorie e l rest pian pian, coi egn, ge volarà ge passèr al Comun General. L'é stat metù sù da pech. Gé calcole che chi che se à metù ite i se dae jù per lurèr delvers. I é dò che i met jù la linies guida per chet Comun General e a mi me sà che i laore delvers, ma no se pel ge dèr n giudizie jà ades, l'é mingol prest."

Elisa Salvi, giornalista enciasèda a Cianacei:

"Gé peisse che sie na istituzion amò joena che amò l'à de gran potenzialitèdes ence per l fat che l'é stat la seconda a nascer dò l Primier. L'à de gran potenzialitèdes per la competenzes che l'à ciapà sù, n muion de ambic respet a dant che l'aea demò la delega da



Mauro Valentini.

la Provincia. Ades con chesta competenzes se à l met de lurèr a na vida dreta sul teritorie, zenza cognèr aer autorizazions da l'aut. E me somea che aboncont sie n òrghen che posse esser de ütöl percheche l'à na vijion de val che secondo me l'é na roba neva. Dant, col Comprenjorie, chet aspet de la projetazion teritoria che tol ite duta la val no l'era. E dapò l me pièsc percheche a cef l'é na femena e gé cree che sie proprio debesegn de femenes te la politica.

I obietives l'é chi de ge dèr più unità a la Val, da n pont de veduda, a mie veder, soraldu urbanistich e ambientèl. L'economia l'é jà na economia turistica e donca sot chet aspet sion jà ensema. L'é ampò vèlch aspet olache se cogn lurèr n muie desche la tutela del teritorie, del paesaje... roba che tel passà no l'é stat fat e chet l'é n òrghen soracomunèl che l pel "impor" cernudes condividudes e ragionèdes per l ben de duta la comunanza e no demò del soul comun o del soul paisc.

Me sà che l sie dò che l laore, sion demò te la pruma fases aboncont veide che l'é de bona intenzions sibie da man del Consei che da man de Cristina Donei, gé la veide n muie empenèda e chet l'é n muie positif."

Mauro Valentini, maester de schi da Ciampedel:

"L'idea la é n muie positiva soraldu se l passaje de chesta competenzes e funzions da la Provincia les vegn desfrutèdes delvers, chet l fossa n muie positif e n muie emportant soraldu per



Paolo Detomas.

I smendrament di cosé aministratives. Ogne Comun ades l'à l'ofize de l'anagrafe, l'ofize tecnich e col Comun General chisc ofizies i podessa esser metui ensema e chet fossa na roba positiva.

I obietives l'é chi de arbassèr i cosé e de aer na unità generèla de duta la val e tor demèz i ciampanii, no desche ades che i pajes de Cianacei e Moena i tira da la sia, ma la Val de Fascia la vif su na economia che influèsc sun duc i comuns, donca ge vel se meter ensema per aer soluzions che vae ben per duta la Val.

L'é prest per dèr n giudizie sun co che se é ponté via, no l'é nience n an e al moment no i à podù fèr granché, ma cree che a cef sie na femena decisa e che chet l'é emportant e positif."

Paolo Detomas, boteghier da Ciampestrin:

"Gio crese che l Comun General sie na roba positiva, ma segur te chet moment i é dò che i cer na linia e na cordanza anter duc i comuns, e chet l'é l passaje mingol più senester.

Seguramentèr l cognosca vardar de coordinar duc i lurieres de la val, no demò chi che i aea jà scomenzà a far desche Comprenjorie, ma ence n muie de autres, peisse per ejempie ai polins e a dute chele robe che podessa vegnir gestide a nivel de val, ence per poder sparagnar mingol sui cosé.

Spre che no i vae a sofoar i picoi comuns, ma crese che chet dipende da chi che i li raprejenta,



Francesco Sommavilla.

e che se l'é la bona volontà no cognosca esser problemes de chet vers, amàncol per l prum temp. Dapò no sé.

Peisse che la roba più emportanta, ma ence la più senestra, sarà l'urbanistica, e dapò sarà valch problem a vardar de meter ensema i comuns ence per chel che varda le speie, conscidran che l'é comuns che à debite e autres che i é en atif.

Gio ensin ades po é amò abù de gran ocasion de jir a sentir diretamentèr de persona coche i é peé via, ma da chel che é podù sentir o lejer dai sfoes me sà che la gaissa la é, e chet l'é jà n muie emportant."

Francesco Sommavilla, geometer da Moena enciasà da Moncion:

"Pense che l Comun General sie na oportunità per la val de Fascia per poder ruar a dorar le ressource juste. Crese che sie emportant per ejempie unificar i regolamenc de frabrica percheche l'é desferenze spropositade da comun a comun, l'é senester tant per i tecnizi che per la jent. L'é giust che su le scelte più emportante sie na basa valiva per duta la val. Dapò gio parle de urbanistica percheche la é leada a mio laoro ma en general dute le ressource e i servijes cognosca vegnir unifiche te duc i comuns, ajache te chet moment l'é n sfrelaus no da pech de jent, de competenze, ence de inteligenze.

Me spete che con la neva istituzion se rue te ogne setor a n maor equilibrie anter i sforc fac



Lucia Dellagiacomà.

e i resultats otegnui. Se sà ben ge volarà temp per meter dut ensema, no se pol pensar de ruar subit a l'obietif, ge volarà capir a man a man che se va inant come che l'é giust far, ma la strada l'é segur chesta. Te na val de nince 10.000 sentadins no se pol pensar de no laorar ensema.

Me sà che l'à scomenzà via polito, la gaissa la é segur, del rest enca la Procuradora Cristina Donei la se mef con na energia da no crescer. Te chisc 5 egn se cognerà meter le basi e ge dar coscienza ai amistradores e a la jent, a na maniera che la saesse olache se cognessa ruar percheche l'é fundamental che la jent la ge crese. Te chist moment me sà che l'Comun General sie amò mingol dalonc da la jent, ma crese che sie enca normal, fin che no l'à a che far per valch motif la jent no la l'sent so. 15 egn che vegn servirà enca a chet, a arvejarin l'nefent a la jent e de chet vers pense che i neves amistradores del Comun General i arà da far."

Lucia Dellagiacomà da Poza, responsàbola del servije infermeristich teritorièl:

"Gio peisse che sie na oportunità n muie grana, unica, che no saon nience dute le robe che podassane far. Peisse che ades aon la val te nosce man e per n muie de robe no podon più dir che l'é "chi da Trent". L'é da se meter a una e se cordar sun chel che volon far, soraldut sul temp lonch. Ge volarà mingol de temp per veder zeche de fat, perché peisse che l'urrier maor sie proprio se meter ensema e dezider ensema che che se vel far de noscia val.

Per mie cont l'Comun General l'cognessa pissar dant da dut a la calità de vita per chi che vif dut l'an te val, magari vardan mingol de manco a l'economia e mingol de più a noscia jent, soraldut ai joegn, cerir de tirar fora i valores che aon te val e se rencurar miec la jent de età.

Gio é n muie de fiduzia, me sà che le persone le sie giuste, n muie ciareade e che se posse far ben. Son contenta che a c'iaf sie na femena, perché l'à la sensibilità per problemes che magari n om l' veit e l' sent de manco, e dapò me sà che sie na femena che se dasc da far. Fosc ge volessa esser bogn de se meter mingol più ensema anter comuns per veder che che se pel far enca tel setor



Oto Lorenz.

sozial, aboncont segur no se pel se spetar che mude dut sobito, entant la gaissa la é. Speron en ben!"

Oto Lorenz, fitacartieres da Vich:

"L'é na lege cader che disc che l'cognessa esser, dapò chesta lege cader da soula no basta, se cogn la empier con i obietives aldò. Da chel che sé gio le competenze che cognessa ge vegnir dat l'é chele del ciamp sozio assistenzial, de l'ambient, de l'urbanistica. Enca se l'é senester percheche dant che i comuns zede competenze de chesta sort... Per cont mie l'Comun General cognea partir sobito co le competenze jà definide a nivel de lege, che le aessa cognù vegnir trasferide inant da na certa data. Enca i ofizies cognessa jà aer le figure de referiment. L'urbanistica l'é n setor important, ge roda dintorn dut, da l'ambient, a l'economia e l' sozial. Gio peisse che l'Comun General cognessa far n intervent unitarie sun duta la val, crear n corp architettonich valif, da Moena en su.

Me spete che dalbon vegne fat na programazion unitaria, olache l'Comun General fasc sintesi de le spente di desvalives comuns. L'Comun General cogn far da referent per duc, valutar le desvalive proponete e le integrar co le altre, percheche duc chenc podesse jir inant delvers.

Gio spere che la Procuradora Cristina Donei la sie bona de se empur e dir "aon na lege, aon n gran vantaje su le altre comunità, percheche aon competenze che le altre le se ensomea, e cognon far coscita". Chest varech aboncont assane cognù l' far jà acà 20 egn perché ades sion n muie inant, aon situazion che ne crea n muie de problemes, peisse a le seconde ciase, a valch zona artejanala studiada mal, ai azesc ai impianc che aon te val e se rencurar miec la jent de età.



Manuel Farina.

posé de lurier e crear coscita n ambient che ge somea più che l'é meso a chel de ciasa. Son n muie content enca che sie na femena a c'iaf del Comun General percheche le femene le é n muie più pratgehe, le sà resolver i problemes con n muie più concreteza."

Manuel Farina, hotelier da Moena enciasà a Vich:

"L'Comun General me sà na roba bona per otimisar l' laor amistratif de la val e se spera semper de più enca i cosc. Me saesse bel che l' diventasse n comun vero e proprie, con n ombolt soul per duta la val, co na amistrazion ben endrezada, fossa l' miec che podesse sozeder.

Segur un di obietives più gregn cognesse esser chel de omogeneisar i setores urbanistics, turistics, e la regoeta e desgorta di refudames sun duta la val col medemo sistem de azion. Me spete enca che a nivel turistic ge vegne dat na gran man a l'Apt per proar a troar sinergie che aidasse enca chet setor.

Me sà che l' sie pontà via delvers. Me fasc gran piajer veder tropes joegn, al scomenz someava che i joegn i fosse stac metui aló proprio percheche no se saeva chi meter, enveze é vedù che tropes de chisc joegn i à gran capacità, i é laureé e co na vijion più averta, soraldut n muie sensiboi ai problemes de soa tara. Chest me dasc na gran fiduzia. Me dasc manco fiduzia enveze certe polemiche forte portade da valgugn che le va proprio dut de l'auter vers de chel che cognesse esser l'prinzip del Comun General de Fascia. Me referesce a le sortide de Talmon, a si ataches a Moena. Me sà aboncont che l'é na gran intelligenza da man de dut l'consei per proar a dialogar. La val cognessa esser più adum possibol. Son n muie content che a c'iau sie Cristina Donei percheche l'à portà n entusiasim fort, chel che delaita del Comprenjorie enveze se aeva perdù."

Franco Pellegrin da Soraga, canzelist te Comun de Vich:

"Gio peisse n muie positif del Comun General de Fascia e son content che l' sie peà via, ma me sà che per coche l'é stat metù ensema, con n sci gran numer de jent, mingol litada, mingol ite de



Franco Pellegrin.

derit, la sie na struttura pesoca e articolada, senestra da gestir. Se sà ben, la neva istituzion comporta segur na gran perdita de poder da man di ombolc, senestra da azetar, aboncont peisse che con mingol de bon sens, lascian fora la politica, se podessa ruar a una senza problemes.

Dal Comun General me spete che vegne portà inant na azion emportanta de sburocratisazion e che i lurieranc de le amistrazion posse aer na maor specialisazion per chel che varda soe competenze: ti comuns picoi defat se fasc mingol de dut e donca se cogn saer mingol de dut, ma a la fin no se é specialisè te nia, da me en fora fossa n muie emportant che podessa mudar chet endrez.

Ge volarà ben amò mingol de temp per poder valutar, ma me sà che l'Comun General sie pontà via con la gaissa giusta, enca se peisse che, percheche l' posse esser dassen percacent, ge volessa che i passajes de competenze i vegnissa portè inant a na vida chiara. Ge volessa che sie na scadenza che fasc fora che dachelanvia le competenze le ge passa a la neva istituzion senza bazilamenc. Demò cosci se podarà aer n organism unitar e zentral bon de jir inant, passan sorafora l'peis de le prescion di sentadins che ogne ombolt à su la schenaj."

Mauro Degiampietro, monter da Moena:

"Sul Comun General no ere tant a una nince canche ere te amistrazion. L'Comun General l'é na volontà politica voluda da Trent, che enveze che con 250 comuns l'averà a che far con demò 14 comunità.

Giò son belebon scetich percheche pense che sarà n dopion del comprenjorie. No veje polito come che l'é impostà: va ben che sie int duc i ombolc, ma veje na gran difficoltà a i meter d'acord duc chi conseieres. Anter l'auter l'é enca semper stat mingol de rivalità anter Moena e Ciampedel e Cianacé e a jir inant n sarà semper de più. Me va benon Cristina Donei metuda a c'iau ades come ades, la me sà proprio la persona giusta, ma te dotrei egn, canche le robe le sarà metude mingol più polito, vegnirà fora beghe per l' poder. Giò no veje per ejejmie su l'urbanistica che un da Moena podesse comanar su Cianacé o vizeversa. Giò no l' veje



Mauro Degiampietro.

possibol e pense che te 10 egn saron metui ancora coscita. Sarà stat passà valch competenza en più ma molar deldut la veje dura.

L'Comprenjorie sarà sù da 25-30 egn: che aone po ciapà dal Comprenjorie? Nia. I primes 5 egn i servirà a meter a post mingol de robe, i refudames, valch su le scole e c. i., i 5 egn dapò la veje negativa perché, descheche é dit inant, te chela che se se rende cont de che poder che l'à te man l' procurador, sarà na bega.

Per partir, l'é ben parti polito, come che é dit enca inant la Procuradora la é tel post giust, l'à bone capacità e la se dedica assà, la se à tot fora l' temp tant dal comun de Moena che da la scola. Ela la é ben partida ben. Ge vel veder te dotrei egn come che la se met."

Michela Costazza, educadora da Poza:

Gio crese che l'Comun General de Fascia sie na endesfida senestra, perché i finanziamenc i é semper de manco e le robe da far semper de più. L'é da tor dant problemes gregn desché la viabilità, l' turism, la realtà che aon chiò e noscia identità fona ladina, ma peisse soraldut che se cogn tegnir cont de la jent, no desmentiar mai la persona, che a la fin l'é chela che sarà enca l' davegnir de Fascia. Fosc enca per mia formazion, gio crese che ades più che mai sie la persona che à da esser valorisada, e donca gio jisse a sostegnir i besegnes soziai de la jent.

Me sà che per esser sci pec meisce che l'é stat metù sù jà se à vedù mever zeche, l'é ite jent che à gust de far, veide da man de la Procuradora e de chi che ge stasc apede n gran empien e n gran estro de portar inant le robe. Me sà che sie le persone giuste, se spera che le vegne sostegnute enca da duta la jent de Fascia, percheche le à besegn de sostegn te chesta gran endesfida, e percheche a la fin gio peisse che l'Comun General l'é la jent, ic l'é i raprezentanc, ma l'é duta la jent che cogn se sentir part.

Cognassane dant de dut, e gio per pruma, se enterassar miec de chel che l'é l'Comun General, e chel vardar de se far sentir e de far proponete, che dapò nesc raprezentanc podessa vardar se l'é de bone idee che se pel portar inant.